

**Zeitschrift:** Annalas da la Societad Retorumantscha  
**Herausgeber:** Societad Retorumantscha  
**Band:** 23 (1909)

**Artikel:** Davart las alps da Samedan  
**Autor:** Gianzun, R. A.  
**DOI:** <https://doi.org/10.5169/seals-187524>

#### Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

#### Conditions d'utilisation


L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

#### Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

**Download PDF:** 11.08.2025

**ETH-Bibliothek Zürich, E-Periodica, <https://www.e-periodica.ch>**



# Davart las alps da Samedan.

Da

R. A. GIANZUN.

---

**D**aspö cha il muond ais muond e l'Engiadina ais Engiadina, ils purs engiadinais giodan lur alps, chargian lur alps. In che möd poi las giodane, in che möd las chargiane? Minchün per se, mincha pur per se sulett? Da vegl, pera propi cha vaivan que drett: mincha singul pür vaiva il drett dad alpager per se sulett; el vaiva il drett da fabricher ün' alp per se e da la charger per se e da la giodair per se, e be per se sulischem sulett, sainza cumpagns e sainza socis. E quell' alp pera perfin cha la pudaivan fabricher inua cha vulaivan, notabene sül communevel. Ma scha que ais vaira, cha mincha pur vaiva que drett, resta la questiun da savair scha faivan üs da que drett cha vaivan. Tschert, cha que gniva avaunt. In veglias bargiaminas chattains menziunedas alps, chi peran dad esser stedas da singuls purs. Uschea in üna bargamina da Samedan u da vschins da Samedan aint a Roseg. Ditts vschins vaivan allura aint a Roseg quatter alps. Quistas alps eiran las seguaintas: L'alp da Zoya, l'alp da Sass nair, l'alp nouva e l'alp Surovel. Ais dunque eir menziuneda ün' alp chi aunz appartgnaiva ad ün tschert Zoya, medem pera da l'avair giodida sulett. Ma scha que po eir esser gnieu avaunt cha ün singul pur giodaiva ün' alp be per se, ad exclusiun dad oters, eira quetaunt la regla? Ma di na, e zuond bricha. E que per bunas raschuns; ils purs savaivan perche cha nun giodaivan ün' alp be suletts, e perche cha scharchaivan cumpagnia. Per giodair ün' alp, voul que bgera roba. Que voul pasters, que voul üsaglia d'alp, que voul tegia e cuvier,

que voul vias e punts. Chi voul giodair ün' alp, stu iffiner la pastiglia, el stu pajer la pastiglia, el stu fabricher e mantegner la tegia ed il cuviert e las vias e las punts, el stu drizzer l'üsaglia. Que cuosta rapps, las spaisas sun grandas. Quistas spaisas evidentamaing il prüm gnieu nun po las supporter. Que nun ais ünguotta per ün purett pitschen, que nun ais neir ünguotta per ün purett mezzaun. Quels haun ün pêr vachettas ed ün pêr sütts: quels pêr töchs sun tuott lur richezza; uschea nun paune spender tschients e millis per drizzer egnas alps, que nun valess neir la paina. Per drizzer egnas alps vulaiva que singiò wakers puratschs, que vulaiva magnats. Quels vaivan poi eir bravas scossas, uschea savaivane druver lur alp. Ma quels magnats sgür e tschert nun eiran la regla, els eiran be ün' excepziun. Scu regla, ün pur sulett nun pudaiva drizzer aint ün' alp be per se sulett. Allura che vaiva'l da fer? Vaiva'l forsa da renunzier all' alp? vaiva'l da tegner sa muaglia süls pasculs chasauns? Que eira impussibel, ils pasculs chasauns nun bastaivan, las alps eiran necessarias, stuvaivan las giodair ad ogni cuost, que eira üna questiun d'existenza. Ma cu fer? Scha nun pudaivan giodair ün' alp suletts, schi pudaivane s'unir cun oters: l'uniun fo la forza. Ma per s'unir, stuvaivane s'organiser. E chi vaiva da's organiser?

Hozindi la chose ais simpla. Vains las vschinaunchas. Las vschinaunchas sun autonomas, ellas haun territori, ellas haun alps. Uschea paune organiser eir las giodias d'alp. In fatt, ellas organiseschan dittas giodias. Uschea ais que hozindi. Ma eira que uschea saimper?

#### Na tschert.

Que sarò bainschi vaira, cha in Engiadina la vschinauncha varò exercito bain bod tscherts dretts e tschertas funcziuns. Ma la vschinauncha da vegl cognitamaing nun eira persuna giuridica, ella nun vaiva dretts corporativs. La vschinauncha nun vaiva autonomia. Ella nun vaiva territori. Ella nun vaiva alps, almain na da regla; almain nun vaiv' la egen pascul d'alp. Ella eira be taunt scu hozindi üna fracziun. Uschea sieus dretts eiran bainischem limitos. Que pudaiva bainschi accader, cha la vschinauncha s'occupaiva singiò allura da questiuns dad alp, e cha la emanaiva tscherts uordens relativs. Uschea nel 1457 la vschinauncha da Samedan ho emano üna charta concernenta las alps da Roseg, in medema reglaiva ella la giodia d'ün tschert pro situo cuaint. In seguit, intuorn ils 1538, cura cha s'avvicinaiva singiò la granda partiziun,

las vschinaunchas peran da s'avair occupiedas da cumpras d'alp ed oters affers consimils. Ma in generel taunt ais tschert, cha il territori d'Engiadina sura appartgnaiva na allas vschinaunchas, ma precisamaing al cumön d'Engiadina sura. A medem appartgnaivan eir las alps, scha nun eiran passedas in proprieted privata, v. a. d. il territori dellas alps, la pas-chüra. Uschea il cumön vess bain pudieu el regler la giodia dellas alps, el vess pudieu organiser medema. Pera cha el nun hegia fatt quetaunt, almain na in möd generel. La giodia dellas alps allura nun gniva administreda e regleda ne tres las vschinaunchas ne tres il cumön.

Uschea ils purs che vaivane da fer?

Stuvaivan s'unir in via privata.

E quetaunt haune fatt.

Ün sulett nun pudaiva fabricher e mantegner tegia e vias e punts. Que cha nun pudaiva fer ün, pudaivan fer püss. Uschea as mettettane insemmel püss.

Ün sulett nun pudaiva iffiner e pajer la pastriglia. Uschea as mettettane insemmel püss. E que cha nun pudaiva fer ün sulett, pudaivane fer in püss.

Ils purs as mettaivan insemmel in cumpagnias, cumpagnias d'alp.

Ils cumpagns nellas bargiaminas latinas vegnan numnos portionales. (Noss compatriots della part sura dian porzunavels.)

Il numer dels cumpagns eira different. Nel 1514 l'alp nouva da Samedan aint a Roseg vaiva 9 cumpagns. Nel 1529 l'alp da Muntarüg da Samedan vaiva 7 cumpagns. Minchün vaiva sia purziun u part d'alp, in latin ars sive pars, art u part. Las parts pudaivan esser differentas. Per que chi risguarda la constituziun dellas alps, schi ais que chapibel cha medema eira fich simpla. Nella bargamina del 1514 aise ditt, cha daja gnir numno 2 cumpagns chi haun da salver las clevs dell' alp e pisserer per l'edifizi. Que eiran ils chos d'alp, capita alpis. Da pü nun eira necessari.

Nun savains quauntas similas alps cha Samedan ho gieu. Nel 1457 cumperan las numnedas 4 alps aint a Roseg. Nel 1514 vegn menziuneda l'alp nouva aint a Roseg. Nel 1529 chattains l'alp da Muntarüg. Nel 1530 vegn menziuneda l'alp Chantaluff, da medema aise ditt cha la pajaiva dischma alla baselgia da S. Antoni.

In quist möd, tres quista organisaziun las alps pudaivan gnir gioldidas. Ma pudaivane gnir gioldidas da tuotts? Que nun pera. Pudaivan gnir gioldidas be dals portionales, dals cumpagns, da quels chi vaivan art u part in ün' alp. Ma na dals oters: nun pu-

daivan gnir giodidas da quels chi nun eiran cumpagns d'alp e nun vaivan ne art ne part in medema. Uschea eira que pussibel, cha ün masser nun pudaiva giodair l'alp, nun pudaiva alpager. E que eira ün difett. Inoltre vains singiò ditt cha minchün pudaiva fabricher sia alp inua cha'l vulaiva, mincha cumpagnia pudaiva fabricher sia alp inua cha ella stimaiva böñ. Ad ais da crajer, cha in generel ils purs pisseraivan da nun fabricher ün' alp memma daspera l'otra: difatti scha fabrichaivan menima daspera l'otra, schi quella tela pas-chüra gniva surchargeda, la muaglia nun vaiva avuonda da maglier. Ma tuottüna pudaiva que gnir avaunt cha üna cumpagnia chi vulaiva fabricher gniva a's stabilir poch dälöntsch dad ün' alp existenta, cun dann da tuottas duos. Allura che eira da fer? Ünguotta!

Ad eira necessari da rimedier. Ad eira necessari da rimedier in que senso, cha las alps possan gnir giodidas generelmaing, da tuotts u almain da tuotts sigls da cumön, e que in möd raziunel, chargiand pussibelmaing mincha alp cun la muaglia cha la pudaiva purter, e na da pü.

Quetaunt dvantet pussibel tres la granda partiziuun dels anns 1538—1543.

Tres la medema las vschinaunchas d'Engiadina sura dvantetan persunas giuridicas. Ellas aquistettan l'autonomia. Ellas survgnittan egen territori. Ellas survgnittan egnas alps. Uschea pudettane regler ed organiser la giodia d'alp in möd pü razionel.

Nel 1554, la vschinauncha da Samedan urdinett sas alps. Ella deciditt da creer 10 alps. Quistas alps eiran las seguaintas:

Aint a Roseg: Alp dad oura da vart dretta, alp dad oura da vart schnestra, alp Sassnair, alp Mysaun, alp ota, alp Surovel.

Aint in val Bever: Alp da Crasta, alp Suvretta, alp Palüdmartscha.

E finelmaing l'alp da Val Murail.

Poi Samedan delimitett il territori da quistas alps. Poi Samedan furmett 10 cumpagnias d'alp. Finelmaing Samedan tres la büs-cha attribuitt a mincha cumpagnia ün' alp ed emanett uordens d'alp. Supra quista granda acziun gnitt piglieda sü üna bella bargiamina, chi declera las chosas in lung ed in larg. Vair doc. No. XI.

Our da medema rilevains ils puncts seguaints:

Nel 1554, nun ais nimia cumpagn d'alp be il portionalis, nun ais cumpagn be quel chi ho art e part in ün' alp. Ma cumpagn

d'alp ais quel chi ho estim sün territori da Samedan. Be quel chi ho estim. Na oters. Quel chi ho estim poi ais cumpagn d'alp e gioda l'alp be fintaunt cha'l ho estim. L'estim nun ais „a fier“, el nun ais collio cun üna persuna eternamaing. Dimperse l'estim ais instabel, el ais variabel, natürelmaing. Il masser po vender sieu fuonz, el po cambier sieu fuonz, el po al perder in oters möds. Scha el perda il fuonz, schi perda'l eir l'estim, allura el nun ais pü cumpagn d'alp. A sa plazza dvaintan massers ils oters, chi haun aquisto que fuonz. Inoltre, il cumpagn d'alp gioda l'alp suainter sieu estim, ad imsüra da sieu estim. Scha'l ho bger fuonz, schi gioda'l bger estim. Scha'l ho poch fuonz, schi gioda'l poch estim. Scha sieu fuonz aumainta, schi aumainta sieu estim. E scha sieu fuonz diminuescha, schi diminuescha eir sieu estim. Uschea ais que vaira, cha l'estim nun ais a fier.

Il cumpagn d'alp ho drett da vuscher. Quauntas vuschs ho'l da der giò? Que paress, cha'l vess da der giò üna, üna vess da baster. Ma Samedan statuiva diversamaing. Nempe ils uordens d'alp dian cler e nett, cha vegn vuscho „suainter lg ·plü dallas vachias d'aestim“. Da möd cha in vuschand in fatschendas d'alp il pur nun rappreschainta se svess. Ma el rappreschainta sas vachedas, el rappreschainta sas vachas, el vuscha a nom da sas vachas. Tauntas vachas, tauntas vuschs. Scha'l ho bgeras vachas, schi ho'l bgeras vuschs. Scha'l ho pochas vachas, schi ho'l pochas vuschs. Scha nun'l ho brich vachas, schi nun ho'l neir vusch. Il sistem po parair originel. Ma que ais sistem, sainza dubi.

Il cumpagn d'alp nun ho be drett da vuscher. El ho eir drett d'alpager, da charger e giodair l'alp. El chargia l'alp suainter estim. Vair pü in sü.

Ils massers vegnan partieus aint in 10 cumpagnias. Pera cha quist compart dels massers nellas differentas cumpagnias vaiva dad esser „a fier per hoatz et qui zieua“. Dunque vess el gieu da dürer in aeternum. In vardet ditt compart vess forsa pudieu dürer in etern, scha vessan düro in etern ils cumpagns. Ma medems nun düraivan in etern, evidentamaing. Medems eiran crastiauns e per conseguenza mortels scu nus oters. Ils cumpagns pudaivan morir. Ils cumpagns pudaivan partir davent da Samedan. Els pudaivan perder lur estim e lur muaglia. Dall' otra vart pudaiva gnir no tiers oters vschins, medems pretendaiwan lur giodia. Poi l'alp pudaiva ir inavous, tres lavinas, boudas e ovazzuns. In quists ed in oters cas, las cumpagnias veglias nun pudaivan rester scu cha

eiran. Dimperse pudaiva dvanter necessari da sfer las cumpagnias veglias, da furmer cumpagnias nouvas, da proceder a gualivaunzas ed incorporaziuns. Ed uschea ais que eir dvanto. Uschea p. ex. nel 17. secul l'alp da Sassnair in Val Roseg stuvett gnir abbanduneda. Ils cumpagns dell' alp Sassnair gnittan partieus aint u incorporatos in otras alps.

Vair Dumengia Saira 1899 pag. 291.

A minchüna dellas 10 cumpagnias gniva assegnera ün' alp. Però las cumpagnias vaivan il drett, scha gnivan per üna, da barratter lur alp.

Ils uordens d'alp della vschinauncha statueschan aucha sur diversas chosas. Per exaimpel sur las vias, las punts, la grascha, las giodias del god, il temp da charger l'alp e la dscherpcha, las tschsedas etc.

Ils detagls poi pudaivan regler las compagnias svessa.

Uschea tschantschaiva la granda bargiamina del 1554.

Medema eira la base del drett dellas alps da Samedan. Ed ella restet la base da ditt drett durante anns ed anns, ün po dir durante seculs. E scha il drett dellas alps da Samedan gnitt in seguit modificho diversas voutas, schi tuottüna in telas occasiuns gnit confirmeda la charta della partizun del 1554: medema vaiva da valair in tuots ils puncts chi nun eiran stos modifichos. Vair in rapport ün artichel del 1719:

„ . . . Finelmainḡ vain in caeteris in tuott et pertuott confirmeda la partitium d'alps fatta sub ao 1554 . . . “

Del rest, chattains decrets in materia dad alps traunter oter nel 1629, 1649, 1669, 1689, 1699. Vair Dumengia Saira 1899, Schantamaints da Samedan del 1697, No. 112, 113, 117, 22, 64, 104, 105.

Da quaists decrets aise da rilever specielmaing que chi risguarda il nummer dellas alps. Vains vis cha nel 1554 Samedan vaiva 10 alps. Da medemas üna eira destineda specielmaing per ils fullasters. Que eira l'alp da Palüdmartscha. Nel 1669, constatains cha nun existiva pü l'alp da Crasta in Val Bever. Nel medem ann, las alps Ota e Sass nair furmaivan be pü ün' alp suletta, medema gniva numneda alp Sassnair u alp Ota indistinctamaing. Da möd cha nel 1669 existivan be pü 8 alps da Samedan. Poi nel 1689 l'alp Palüdmartscha pera chi nun eira niauncha pü buna per ils povers fullasters; vschins decidittan da sfer u disfer ditta alp e da fitter la pas-chüra all' alp Suvretta. In seguit, vschins decidittan

dafatt da ceder la pas-chüra da Palüdmartscha all' alp Suvretta. Nel 1719, gnittan ils massers dell' alp Ota u Sassnair plandschand e fand valair. cha il vadrett e las ovas hegian fatt dann a lur pas-chüra, alla tegia ed al cuviert, uschea cha nun possan alpager scu ils massers dellas otras alps. E Samedan deciditt cha l'alp Ota u Sassnair dessa gnir sfatta u disfatta e cha ils massers da ditta alp dessan gnir ratos aint u incorporatos nellas otras alps. Uschea nell' ann 1720 Samedan avett be pü 6 alps: Las 4 alps da Roseg, nempe la prüma, la seguonda, l'alp Surovel e l'alp Mysaun, poi l'alp Suvretta e l'alp val Murail.

Ans resta da dir aucha qualche pleds sur las alps in Val Bever.

Da vegl, l'uvas-chieu da Coira vaiva in Engiadina sura bgers bains. Traunter oter vaiva'l eir bgeras alps. Che alps vaiva'l? vaiva'l eir alps in Val Bever? Ils urbaris del 12. fin 14. secul nun and faun menziun, medems nun menziuneschan alps dell' uvas-chieu, specielmaing na alps da medem in Val Bever. Nel 15. secul l'uvas-ch svess nun cunschaiva sieus bains in Engiadina sura, almain na in möd exact. Vuliand metter uorden nell' administraziun da sieus bains, l'uvas-ch stuvaiva natürelmaing in prüma lingia savair che bains cha'l vaiva. Per savair quetaunt stuvaiva'l dumander, el stuvaiva dumander ad oters chi savaivan quetaunt. Uschea per l'Engiadina sura l'uvas-ch dumandett a noss antenats quels eiran ils bains dell' uvas-chieu in Engiadina sura. La dumanda eira lecita. E respuonder füss sto curtaschia. Ma noss antenats nun eiran curtais, almain na quella vouta. E vaivan buns motivs. In fatt, l'uvas-chieu vaiva do sieus bains in mauns a glieud del pajais, saja in feudo, saja a fitt, a livè u in oter möd; la glieud del pajais vess gieu da pajer all' uvas-chieu fitts e dischmas e da que co. Fintaunt cha l'uvas-chieu eira possaunt ed eira administro cun uorden, la glieud del pajais vaiva pajo e fitts e dischmas e tutti quanti. Pü tard, l'uvas-chieu eira decadieu, sia administraziun eira gnida al main. Allura la glieud del pajais and vaiva profito amplamaing. Feudataris e fittadins, giunkers e purs vaivan profito della buna occasiun per fer lur interess. In ün möd u l'oter, u da riff u da raff as vaivane liberos dall' uvas-chieu, vaivan piglio ad saccum ils bains da medem, vaivan contesto sieus dretts, vaivan cesso da pajer dischmas e fitts. Uschea staivane bain e giodaivan lur vita. Uossa tuott in üna vouta l'uvas-ch vess vulieu, cha renunzian a que cha vaivan obtgnieu e cha decleran, cha l'uvas-ch possa pretender fitts e dischmas e da que co! Que eira pretender bger.

Noss Engiadinais nun udivan da quell' uraglia. Laschettan cha l'uväs-ch dumanda zieva a sieus dretts, e nun respundettan, simplamaing. Il silenzi eira or. Uschea l'uväs-ch nun gnitt pü a savair che dretts cha el vaiva gieu in Engiadina, almain na in möd complet. Ed el nun pudett inscriver quists dretts in sieus urbaris e registers, ad æternam rei memoriam. Ma el stuvett as cuntanter dad inscriver que poch, cha el savaiva. E l'inscriziun tuna uschea:

„Es ist ze wissent, dass mir nit wol kunt ist umb die lehen in dem Engedin, won sy hont die nit verschriven gen . . . .

Item in dem Engedin ob Pontalt hat daz Gotzhus vil höf. alpen, zehenden & güter. Die sind den Planten versetzt . . .“

Vair Muoth, Zwei Aemterbücher des Bistums Chur aus dem Anfang des 15. Jahrhunderts, pag. 134, 135.

Dalander risulta, cha l'uväs-chieva vaiva in Engiadina sura bgeras alps. Invece nun risulta che alps cha'l vaiva, e specielmaing nun risulta scha'l vaiva eir alps in Val Bever. Lossupra aise invece da congualer il documaint anness No. III.

Nempe:

L'uväs-ch da Coira vaiva traunter oter il drett da numner in Engiadina sura il vicedominus. „Item ain bischof hat och ainenvitztum ob Pontalt.“ (Muoth, l. c. 47, 59; Meuli, Entstehung der autonomen Gemeinden im Oberengadin, p. 22.) Il vicedominus eira ün uffiziant dell' uväs-ch; el administraiva las scussiuns, las impinaschuns, ils trapass da fuonz, ils testamaints, el administraiva eir ils bains domaniels e fiscals dell' uväs-ch. Uschea pera, cha el hegia administro eir las alps dell' uväs-ch, specielmaing eir alps in Val Bever. L'uffizi da vicedominus dell' uväs-ch eira ün temp in mauns della schlatta da Rietberg. Da quista schlatta savains poch. Que eira üna schlatta estra. Siand immigreda nel Grischun, residaiva ella nel chastè da Rietberg in Tumgias-cha, propriet dell' uväs-ch. Nel 13. secul, ün Rietberg eira vicedominus del Surset. Poi ün Rietberg, scu ditt, dvantett vicedominus dell' uväs-ch in Engiadina sura, el survgnitt l'uffizi in möd da feudo. In quist' occasiun survgnitt el in mauns eir las alps da Val Bever, specielmaing, a que chi pera, la part dad ains. In seguit, ils Rietberg murittan our. Allura il vicedominat d'Engiadina sura passett als Plantauns, saja in feudo u scu pegr. Lossupra, nel 1410 l'uväs-ch Hartmann inscriva in sieus cudeschs:

„ . . . quod filii Schorchs Plant subscripta feoda dederunt nobis in scripto :

Primo officium vicedominatus, quod quondam de Rietberg ab ecclesia curiensi in feodum possidebant.“

Ils Plantauns possidettan allura eir las alps da Val Bever, cioè quellas dad ains. Dals Plantauns poi quellas alps passettan als Travers ed als Schers. Nel 1528 poi, Val Bever dad ains appartegna als Travers ed als Schuchauns.

Vair Muoth, l. c. pag. 47, 59, 135.

Nel 1526, Cumönas traïs Lias vaivan emano ils famus artichels da Glion. Tres quists artichels las Lias declarettan scadieus u limitettan ün grand numer da dretts feudels. In conseguenza in tuott il pajais grischun ils purs uzettan il cho e la crasta e pruvettan dad abolir ils rests del feudalismo. Uschea eir in Engiadina sura. Lò il cumön considerett, cha ün tel drett feudel, aboliu tres ils artichels da Glion, saja eir il drett vi da Val Bever dad ains, e cha que drett saja scadieu a pro del cumön. Uschea il cumön cumanzett process cunter ils proprietaris da Val Bever, Travers e Schuchauns; in quist process il cumön fett appunto valair, cha Travers e Schuchauns hegian vi da Val Bever ün drett feudel u livè, e cha que drett saja tres ils artichels da Glion dvanto caduc. Da lur vart, Travers e Schuchauns fettan valair, cha lur drett vi da Val Bever nun saja ün drett feudel u livè, ma bainschi ün simpel drett da proprieted privata, aquisto tres cumpra ed ierta. Il tribunel sentenziett, cha il drett da Travers e Schuchauns nun saja dvanto caduc, e cha il plaunt del cumön vegna respint. Tuottüna il Tribunel arcunschett, cha il cumön hegia in rapport a Val Bever ün drett da preferenza in cas da vendita u da fitt.

Nel 1538, las vschinaunchas d'Engiadina cumanzettan a partir il territori del cumön. Allura Bever survgnitt Val Bever dad our. Nel act da partizun del 1538 aise ditt, cha a Samedan e Bever vegna reservo il drett da cumpreter Val Bever. Vair Meuli l. c. pag. 99.

Nel 1538, Samedan e Bever cumprettan poi da Travers e Schuchauns Val Bever dad ains cun las alps. Doc. No V.

Nel 1540, Samedan e Bever fixettan ils cunfins e las scuren-tschas (cohaerentiae) traunter Val Bever dad ains seu proprieted cumöna e Val Bever dad our seu proprieted exclusiva da Bever. Il cunfin daiva esser „in quella gianda groassa . . . spera quellas peidras groassas intraunter las quaelas chia la via passa, inua chi eira üna uouta la serra per la quaela gniua intertgnieu la muaglia“.

Lò gnitt miss ün term, il term gianda. Medem vaiva da separer e god e pascul. Doc. No. VI.

Nel 1546, Samedan e Bever procedittan ad üna partiziun da lur part cumöna da Val Bever. A tenur da quista partiziun gnitt partieu il pascul. Invece il god restett cumön ed indivis. Nel medem ann, ditta partiziun gnitt confirmeda. Doc. No. VII e VIII.

Nel 1547, Samedan fabricheitt in Val Bever l'alp da Crasta. Samedan fabricheitt ditta alp sün sieu territori, sün sia pas-chüra. Bever protestett cunter quista fabrica, scu motiv da sia protesta Bever fett valair, cha ditta alp saja memma ardaint a sieu confin. Il tribunel da Sur fontauna merla sentenziatt nel senso, cha Samedañ hegia il drett da fabricher l'alp da Crasta in que lö. Medem tribunel sentenziatt in quell' occasiun eir sur vias, saivs ed otras chosas. Doc. No. IX.

Nel 1551, Samedan e Bever emanettan ün uorden forestel concernent lur „Thais cumoen“, ils gods da Val Bever dad ains. A norma da quist uorden forestel ils gods da Val Bever vaivan da servir unicamaing per las alps della val. Lossupra vaivan da chürer ils muntaduors. Vair Jahresbericht der Histor.-antiquar. Gesellschaft 1906, pag. 153. Doc. No. X.

Nel 1554, Samedan emanett sias ledschas d'alp, la Magna Charta Alpium de Samaden. In quistas ledschas d'alp vegn trattu natürelmaing eir dallas alps da Samedan in Val Bever: Alp da Crasta, alp Suvretta, alp Palüdmärza.

Nel 1638, ils 20 Meg, Samedan e Bever gnittan perüna da partir lur tais cumön in Val Bever. Doc. No. XI.

Ils 22 Meg 1638 poi dittas vschinaunchas numnettan la cumischiu da partiziun. In quist' occasiun gnitt eir decis da nun partir il tais cumön tuott inter, ma da reserver ün töch in comunaunza.

Lossupra vegn ditt:

„ . . . . ais . . . . limito ls cuffins dalla vart schneistra, che nun dess ne poassa passaer aint ne hoatz ne qui zieva la Blais suot il Pitz hot et da dour la punt suot l'Alp Palüdmartscha daco che in ün boeschg sulet giu d'im la Blais signo ais cun üna crusch. Et da que Boeschg signo tagliand vi da drett eir in ün oter Boeschg in quella Blaisetta sulet cun üna crusch in mez nudo da d'our il chiaunt a rivaer in Palüdmartscha. Lg arest dalg God u Thais tuott da snestar e da drett infina oura als cuffins da Bever vain tuott partieu in duos parts cioe dals prescritts terms inoura

giüst e prudaintamaing per saimper tenur la cufgnieňtscha sine fraude e dolo sco sgunnda: . . . . “

### Documaints.

#### I.

In nomine domini amen. Anno incarnationis eiusdem domini MCCCCCLVII die vero dominico vicesima sexta mensis iunij exeunte inductione quinta ibique andrea dictus paswell bastianus filius moina et michell zyan eorum nomine nomine et vice coniuancia totius vicinacie de samaden pro se et eorum successoribus omnibus melioribus et eciam cum voluntate et consensu omnium vicinorum de Samaden statuerunt locauerunt et ordinauerunt quot omnes illi vicini de samaden qui habent aut poterunt habere cum iure artem siue partem in alpibus vall rosayg secundum quod omnes bene sunt unianimes siue fortiauerunt. Quot vna quisque alpis vall rosayg debet exire suum annum et cargare cum vaxis de alpibus super pratum siue alpem que fuit andree que fuit argoga quam prefati vicini emerunt cum omnibus eiusdem iuribus et pertinentijs. Item forciauerunt et ordinauerunt quod in isto anno primo debet incipere alpis que fuit zoya, secunda debet exire alpis de sass nair, tertia debet exire alpis noua vsus extat sass nair, quarta debet exire alpis de superaquele et secundum ordinem perpetuum et non plures pro nunc sine voluntate vicinorum. Et quaeque alpis non vellet exire tunc indubitanter debet crodare aliis alpibus C lib. in promtis denarijs et provincias (?) Etiam debet exire cum alpe perpetuo et numquam intrare contra locamentum et sine aliqua contradictione alicuius persone. Et cum voluntate omnium vicinorum testes qui interfuerunt vocati et clamati iacobus zian moina pretz conuici suprascripti et quam plures.

Et ego gaudentius de sellio publicus imperiali auctoritate notarius vallis engadine hanc cartam condidi, confeci et scripsi.

#### II.

1514 Indictione 2<sup>a</sup> die martis secundo may. Infrascripti sunt portionales qui habent partem in alpe noue superiore aut intus in roseg. Et quilibet eorum nouem habet segurationem unam videlicet ponendo intus quilibet vachas sex et isti sunt petrus guiz, boess, petrus dictus schweder, jacobus piecka, nichlaus papa, gian balastin, andreas guiz, baltram fugung, et heredes gian piecka. Et etiam cum pacto qualis velet vendere sua jura in alpis quod debet conuitare suprascriptis portionalibus prius, et post si vllus eorum

vult emere tunc potest vendere cui placet. Item etiam cum pacto si defecerunt vachae portionalium, tunc debent communiter querere vachas, et si aliquis habet ultra aut plus vachas quam potest habere de jure quod debet soluere pro qualibet vacha k 1 pro herba videlicet cui non ponet vachas totum intus. 2 cr. Et etiam cum pacto quod suprascripti omnes nouem debent communiter mantu-nere illam alpem fabricando et faciendo id quod necessarium fuerit intus quolibet pro sua contingente parte. Et etiam cum pacto quando exeunt alpis quod debent eligere duos portionalium custodiendo alpem et dando sibi clavis alpis. Et illi qui electi fuerunt debent esse sub pena librarum V promtis denariis societate.

Actum in Samaden in domo jacobi prisca presentibus superscriptis portionalibus et bernardo brutel lazero filio et jacobo prisce.

### III.

#### Santenzchia causa Valbeuar intraunter lg Cumoen et ls Wschins da Beuar.

In nom dalg Segnar amen. Ao 1528 adj 20 May tgnand bachetta in Valbeuar spera Lalp dalla wschinaunchia da Beuar dalg Cumoen D'Aengiadina zura Lg Noebel hom Jachiam Castelmur da Visafran dalg Cumoen Braiglia cun ls Infrascrits Noebels et discrets Hommans Truuaduors specielmaing ad aquaist ellets et tschernieus tres Cumischiun da Cumoea Chiade, cieo Gualter Gualtier Citading da Cuoira, Rodolph Furkar Ml in Trimmis, Jan Goeri in Fürschnou, Jan Gilli da Vatz, Jan Doscha da Sauugnin, Jan Capel mastrel in Baiuj, Pol da Marmureara, chiaschlaun in Grifastain, Jan Tuchessa da Dardetz, Harich dalla Ganda da Tuuar, Antonj Tumasi de Duff da puscheff. Sun cumparieus auaunt sspta Drachiüra ls Noebels et dischcrets Hommans Curadin Planta e Jachiam Geir da Zuotz, Janet Riet e Gianuot Buosch da Schianf, Peidar Drusan et Peidar Faschaun da Chiamuesch, Nuot Cuotta da Beuar, Jan Leta da Samaedan, Jachiam Verzilli da Puntraschina, Jan Maletta da S. Murezi, Gilli Loeng e Sauet da Salaplauna, Gudains Deng da Selg, tuots eletts et cun lg saramaints strits auuos da tuot lg Cumoen d'Engiadina zura, et uschea haun tres lur pystand Jan Doscha spt. schanto ün plaunt contra lg Noebel Peidar Trauers Mastrel dalg Cumoen spt. fadschiand a sieu nom et a nomma da seis Hertaevals, scho eir contra da Jachiam Schuchiaun fadschiand a nomma da Merita figlia da quondam Margk

Scher sia brüd et tuot seis Hartaevals, dschand chia saia uaira chia els respundedars u uairamaing lur antecessuors, u quels chi ls hauessan do, hegian hagieu et giudieu üna tscherta ual ditta Valbeuar, otras uoutas steda inuestitura concessa a Sgrs Plantauns da dün tschert Sgr de Rietberg u Vuaschg da Cuoira, la quela Alp lur antecessuors haun cumpurto chia eir ls Hommens dalg Cumoen principelmaing ls wschins da Beuar pudessan giudair cùn vachias, bouffs, u in otar lur bsoengs, dalg che els bain s'cuntantaiuan. Alla fin saia ditta Val gnida a mauns da ditt raspunda-duors saia suot titel da Hierta u suot titel da Cumpra. LS quels nun haun musso üna gratia als Fschins da Beuar in ditta Val, anzi fatt grand dan a tuot lg Cumeon et alla wschinaunchia spta in lg yr et turner, saia sün lg paschg cumoen, scho eir in ls bains da terzas persunas, lg che els nun craian chia saia güst et apusaiuel et chia nun poassan plü cumpurter. Per quella causa haun spts plandschaedars gäuüscho uia als Raspundedars chia ueglian in rasguard da que chi ais sto sü zura motiuo scho eir dals Artichels ultimamaing fatts chi ueglian ceder et lascher la sspta Val alg Cumoen, vfferind dals restituir tuotta quella somma chia daun per ditta Val schburzo, saimper in lod dalg drett, siand ditta inuestitura inlicita, la quela chi daiua plü bot gnir concedigda alla wschinaunchia et Cumoen sspts cho a particular persunas. Vschea crajane mediant üna santenzchia chia uegnan costrits a cedar insemmal cun tuot dans et cuosts per quella causa. Alg quel plaunt haun raspundieu ls respundaedars tres lur pystand Jan da Doscha sspt dschant chia saia uaira chia quels chi ls haun do aquella val a lur antecessuors chi haun hagigda et giudigda infina lg preschaint scho ho saimper fat aqueles chi laun deda giudigda et possedigda. In la quela scha füs iscuntrö ün qualche gratzchia als wschins da Beuar schi füsne eir els cuntaints ls raspundedars, ma chia ueglian a cho tres usurper alchün dretts in dan da dels raspundaduors dalg quel chia nun craian chia cun radschun poassan iscuntrer. Et chia supraditta val saia steda daeda inuestitura u Aliue a dels u a lur antecessuors da quel Sgr da Rieperg u dalg Vuaschg da Cuoira nun craiane, perche ne els ne quels chi laun daeda a dels haun me paio üngün fit ne otra graueza ne a da quel da Rieperg ne a la Baselgia da Cuoira. Anzi chia els haun arto e cumpro ditta Val a moed da proeui bain, scho eir oters lur bains uschea haun giudieu et posedieu, dacho chels ueglian amusser tres istrumaints et otras scrittüras authenticas. E mhae

nun craian chiüngjün ls poassa in uigur d'alchiün artichiels priuer da lur proprieted da sspta Val. Vschea managian et instan chün drett ls ueoglia absouer et libarer da tuottas dumandas da ls sspts plandscheduors, insemmel cun tuot dans et cuosts. Vschea hauiand ün drett inclet plaunt e raspoasta ditts e cuntradits, istru-maints e otras scritturas pardüttas, uis lg lhoe della diffarentia, e tuot aque chia las parts haun purto in drett, lg tuot bain pondaro, lg nom dalg Segnar inuochio et santintzchio per lur saramaint scho sguonda:

1. Chia ditts raspundaduors poassan quella Val et Lalp chi ais staeda in dischpütta giudair pussidair scho daun fatt els et lur antecessuors zaintza contradiction d'üngiüna persuna, et per yr in ditta Alp et Val dessan hauair uias per yr et turner, dacho chi ais infin in huossa scuncontro et haun hagieu, saimper sün ilg mendar dan sainza contradictiun dalg Cumoen d'Engiadina zura e da dotras qualunque persunas chi saian.

2. Inua chia dischcuntres in lg evegnir chia ditts respunda-duors u lur hartaeuals uulessan aquella Val u Alp uendar u insiner chia saian culpaunts primo da la spoorzer alla wschinaunchia da Beuar, et scha ditta wschinaunchia nun la uules cumprer u piglier a moed da pain, alura la desne offerir a tuot lg Cumoen d'Engiadina zura. Et scha eir dit Cumoen nun la uules acetter in moed utsupra, alura la poassan uendar et impiner a chi ad els et lur Hartaeuals bain plascharo, zainza contradictiun d'üngiüna persuna.

3. Scha dischcuntres daschpö chia ls Raspundaedars hauessan chiargio ditta Alp cun la muaglia inuarnaeda u cumpraeda per faer marchaintia, scha supravanzes qualche paschüra la quale chia uulessan fitter, alhura la daiane primo la spoardscher als wschins da Beuar, et nun la uuliand acetter, a lg Cumoen d'Engiadina sspt. E caso chia nun sauessan sacurder per uia dalg fitt, allura schi desse dit fit gnir do per cusalg d'Homans da bain ls quels nun haun in aquaist fatt interes. Et inua ditt wschins da Beuar ne lg Cumoen sspt uulessan acetter in moed uts., chia poassan que fitter et daer a lur bain plaschair et melder giudair sainza contradictiun dalg sst Cumoen e d'üngiüna otra persuna. Et per meldra uerificatiun et fe he eau Jachiam da Castelmur Mastrel da la preschainta diffarentia tres Cumischiuun dals ssts Truuaduors mis mieu sage a la ssta santenzchia, a mi et a meis Hartaeuals scho eir als Truuaduors et a lur Hartaeuals sainza dan.

Duanto in lg lhoe et dj sst.

IV.

**Santenzchia da Lalp Muntarüg contra ls wschins da Beuar.**

In nom dalg Segnar amen.

Ao 1529 adj 2 Juny.

Tgnant bachetta Jan Marting Deng Mastrel d'Engiadina zura sur Funtauna Merla cun seis truuaduors, causa üna differentia da düna Alp chi gniua fabricheda da set wschins da Samedan in Muntarüg in lg plaun da Seluas ais cumparieu aunt lg drett Nuot Cuetta et Gianuot Zanbun da Beuar Cuuis da ditta wschinaunchia dschant chi ditta Alp nun poassa ne dess essar fabricheda in dit lhoe, siand dit lhoe da quels da Beuar, e siand lur Buual, et hauiad bsoeng da lur paschg per lur muagla et uschea managiane mediant üna sentenzchia chia dits wschins da Samædan dessan desister da la fabrica da ditta Alp et chia quella nun dess ne poassa a cho essar fabricheda, a la quela dumanda ho respondieu S. Raduolph Salis Cuuich da Samædan cun seis Assistents S. Jachiam Biffrun, S. Antonj Planta et Jan Leta, dschant chia ditta Alp daia et poassa a cho essar fabricheda siant chia dit lhoe et paschg ais cumœn taunt a quels da Samædan scho quels da Bevar et chia quels da Bevar hegian eir edischio et edificheschan utro Alps dintuorn ls Cufins da quels da Samædan. Sü sura hauiad lg Drett las parts uschea inclett Ais ieu sün lg lhœ dalla differentia et sün tuot aque chia parts haun purto auaunt, let scrittüras, Instrumaints, et lg tuot bain pondero haun güdichio, scho sguonda: Chia ls sspts da Samædan poassan fabricher ditta Alp da cho chia laun cumanzaeda cun ls packs infrascrits cione chia la muaglia da ditta Alp poassa paschuler da la punt da Roeuan inaint per tuotta la val fin lg Flüm paro zainza dan dals pros. Item da la punt da Roeuan inoura uers la straeda chi nun poassan gnir ingiu uers lg plaun our duart ls terms mis da lg st drett giu bas scho sguonda a Muntarüg. Ls quels terms sun mis chi s'guardan dretta Linia lg ün lg oter, lg ultim term chi ais sur la punt da Roeuan, lg quel term tira in giu dretta Linia a la punt da Roeuan et aque sulamaing per la muaglia da ditta Alp. Ma la muaglia da la wschinaunchia da Samaedan chia quella poassa paschuler da pertuot zainza arguard da düngün terms, et aque chi ais iscuntrò ais per causa da la ssta Alp et brichia per otar. Item chia tres aquaista sentenzchia nun dess essar pregüdichio ad alchün Istru-

maints u dretts da las parts, ma chia dessan raster rats e fermis. Duanto in Samaedan in chaesa da Jan Baratta preschaint sst Drett et rogo tres S. Zoartsch Travers.

V.

**Cumpra d'Val Bevar tres ls da Samaedan et da Beuar our da Janet Schuchiaun.**

In nom da Dieu Amen.

Ao 1538 adj 3 Setember Fadschiand Janet Jachiam Schuchiaun a nomma da sia Duonna Merita figlia da Marg Scher, et Schimun figl da peidar Trauiers tuots duos da Zuotz per els et lur Hartaeuals haun uandieu et libramaing cedieu als Noebels et prudaints S. Antoni Planta, Steiuan Marting Deng et Andrea Biffrun Cuuis dalla wschinaunchia da Samaedan, Item Gudeng Tirel, Jachiam Nuot Pitschen et Jan Lichin Cuuis dalla wschinaunchia da Beuar stipoland a noma da lur wschinaunchias Valbeuar cun las Alps et proper mithaed, cun las seurentschas da damaun uart la wschinaunchia da Beuar, da metzdj las wschinaunchias da Samaedan, Cellerina et S. Muretzi et Syluaplauna cun lur munts et Alps, da saira uart lg Cumoen da Baiuj, d'üngüna hora lg Cumoen da Tinizun et Brauuong reseruand pero erur da sentenzchias. Et aque cun tuot bun dretts da Aschg et paschg, Edifizis, uias, semdas et qualunche otar drets zuond ünguotta arsaluo, et aque per pretsch da raintschs milli et oagtschient dico R 1800 k.—, in danaers bluots quintant krüzars sassaunta per ün arainsch, per la quela summa ls ssts vendedars faun Confessiun da dessar paios et contantos e per que imprumettane da defendar et guaranter et mantegnar auaunt qualunque radschun taunt ecclesiastica cho seculera zainza dann et cuosts da suprascritas wschinaunchias, suot obligatiun per els et lur Hartaeuals. Dvanto in Bevar preschaint Jan Schochia da Puntraschina, Jan Martin Deng da Samaedan et me infraserit Nudaer chi hauains apritzo la ssta val.

Jan Figl da Jachiam Trauiers da Zuotz.

VI.

**Santentzchia dals Cufins d'Valbeuar.**

In nom da Dieu amen. Ao 1540 dj 10 September Aduertind üna differentia intraunter la wschinaunchia da Samedan e Beuar causa ls cufins d'ualbeuar da dains u dadour gianda ais tres lg

drett da tuotta la terra tgnand bachetta Mi S. Jachiam Biffrun sur Funtauna Merla cun seis Truaduors ordinos allo tiers giüdichio et termino scho sguonda: Chia ls cusins da ditta Val dessan essar et saian in quella gianda groassa la quaela chi ais uers la Val dadains spera quellas peidras groassas intraunter las quaelas chia la uia passa, inua chi eira üna uouta la serra per la quela gniua intertgnieu la muaglia, in lg quel lhoe des las parts mettar ün term, lg quel term des tagler davart dretta sü alg fil et pitz dalg munt a dretta lingia, et da snester a trauiers zieua lg zit da que muntet in thel moed chia que chi uerdscha et penda da som aque muot inaint pertain alla val dadains, et que chi ais som lg muot u uerdscha inoura pertain ad aquels da Beuar. Et uschea siand fatt dit cusins des ambas parts giudair ainfra seis terms zainza dan da lotra, saia cun s'alagner u paschuler. Duanto in lg lhoe dalla differentia in praschentscha dallas parts et rogo tres S. Jachiam Biffrun.

## VII.

### Partiziun da Val Bevar aint da dains Gianda.

In Nom da Dieu amen. Ao 1546 adj 3 Juny siand Valbeuar da dains gianda cumpraeda et alchüns ans giudigda in generelmaing da Vschins da Samaedan et da Beuar, et huossa giudichant per lur melgder giudair dalla partyr per mithed: Vschea sune cufgnieus vnidamaing da elegier nouff hommens zainza part, ls quels gaiian sün lg lhoe, pondareschan tuot sutilmaing, et a chi tuochia cun la soart saia da metz inaint u da metz inoura daia vair que per sieu aegian. Et per faer ditta partizun sun elets ls suotscrits, Jan Jachiam Schuchiaun da Zuotz, Jan Meletta da S. Murezi, Jan Tiracl da Cellerina, Battrumieu Biffrun, Steivan Marting et Lücy dalg Groas da Samaedan, Jachiam Nuot pitschan, Januot Curo et Januot Zanbun da Beuar. LS quels 9 hommans siand in ditta Val raspos haviand tuot bain contempo et pondaro, haun partieu et termieu scho sguonda:

1. . . . .

Et auntz cho faer quaista diuisiun sun las parts cufnidas in moed scho sguonda:

Chia inmünchia Wschinaunchia poassa chiarger u schiarger sia part a sieu bain plaschair, saia cun bger u pog inumber d'muaglia et cun tuotta soart d'muaglia, arsaluo muaglia mnüda.

In circa dalg got ais cufgnieu chia tuotta boaschia, zuondar, tschopa, züchias et foeglia, chi ais in tuotta la val, aint da dains

lg term Gianda, saian cumoen et vegnia parchüro zainza partyr a nomma da tuottas duuos Wschinaunchias.

In circa las vias ais cufgnieu chia tuottas duos wschinaunchias las mantegnan bunas et sufficiaintas infina alg prüm törn da ditta crasta, et aint da dains dess mantegner la Wschinaunchia da Beuar alla quela ais tuchio la part aint dadains, et quela wschinaunchia chi gnis clamaeda da lotra a chiüntscher las uias et chella nun ubedis chia la poassa faer yr aint lauraints a chiüntscher a cuost da quella chi intarda suainter chi fo bsoeng.

Dalg pandrer ais cufgnieu chia quela wschinaunchia chi trappaissa seis terms a paschuler chia la wschinaunchia danaeda poassa pandrer per inmünchia uouta ün araintsch bluot per ün münchenia alp d'vachias.

Dalg chiarger, scharger et tschsesdas ais pachio gio chia la part dadains in charger et schiarger poassa transir zainza paschuler a buna fe. Et gnand maela ora da naif po la wschinaunchia da Beuar tschser tres la part da doura cun sia muaglia sulamaing per ün dj per inmünchia uouta temp da maela ora uts. Mu inua chia dischunteres chia la maela ora continues tuotta dj u lg oter dj füs lg istes, alur la wschinaunchia da Beuar des paser la val et part dadoura per transit sulamaing zainza paschuler, et sumgiauntamaing eir turner inaint.

Circa las Alps et marguns da s'resigner aint a maun lg ün lg oter ho ls ssts 9 Hommans arsaluo da declarer alla sing da la decisiun.

Duanto in sspta Val daschpera ls terms, in praschentscha dal-las parts et sspts Arbitraduors et rogo tres Jachiam filg da Jan Biffrun da Samaedian.

### VIII.

#### **Conventiun et Confirmatiun della Diuisiun d'Valbeuar.**

In nom da Dieu amen. Ao 1546 adj 9 September sun las wschinaunchias Samaedian et Beuar in praschentscha dals 9 Hommans chi haun partieu et termieu Valbeuar bain adacoard et cun inproönschiun da saluer et staer a tuot aque chi sudetts 9 Hommans haun giüdichio et dacho chi ais cun la soart tuchio ad imünchia üna zainza contradictiun ne müdder otar, et circa dallas Alps et marguns das agüster et gualiver ho sspts 9 Hommans fatt gualiver cun daners bluots. Duanto part in Valbeuar lg prüm dj

et lg otar in Samaedan in chaesa da Nuot Tschürella praschaint ls sspts 9 Hommans et rogo tres Jachiam filg da Jan Biffrun da Samaedan.

IX.

**Santenzchia dalla Wschinaunchia da Samaedan incunter ls Wschins da Beuar causa Lalp da Crasta d'Valbeuar et la Via.**

In nom dalg Segnar amen. Ao 1547 dj 21 May tgnand bachelletta me infrascritt Georgius Travers Mastrel in Ciuil sur Funtauna Merla cun meis Truuaduors Jan Tirel Jachiam Fachin et Jan Balzar da Tschlarina, Murezi Tumesch Andrea Minzin Jan Schochia et Januot Zanbalg da Puntraschina, Jan Maletta Goeri Pol et Andrea Büstü da S. Murezi, Jan Sauet, Jan Jachiam et Adam dalg Rober da Saluaplauna, Jachiam S. Barnart Jan Tibot et Antoni Bagot da Selg. In causa et diffarentia intraunter wschins da Samaedan et da Beuar per la causa infrascritta. Sun cumparieus Jan Caspar et Jan Lichin tuots duos Cuuis dalla wsch. da Beuar et cun els Jachiam Nuot Pitschen, Gudeng Tirel, Januot Zanbun et plüs wschins da Beuar cun lur pistand sst Jan Maletta, et a cho auaunt drett haune proponieu chia ls wschins da Samaeden hegian cu manzo a fabricher üna Alp la quela uegna aedischeda memma ardaint als cufins e terms da quels da Beuar et chia que nun poassa iscuntrer zainza grand dan, et uschea managiane chia dessan desister da quella fabrica et paier tuots cuosts. Sü sura ho raspundieu S. Raduolph Salis lg Giuuen cun Jan Mathia Cuuis da Samaedan cun plüs assistents chia saia fatt üna diuisiun da tuot Val Beuar intraunter ls da Samaedan et da Beuar, cun pagk chia inmünchia ün possa fabricher ainfra seis terms a sieu bain plaschair, et in uigur da que s'pretendane da pudair fabricher quella alp per hoatz et qui zieua. Et melgsinauant craiane et instaun chia ls uegna do tiers da fer üna uia per lg plaun da dains Crasta trauersand la Crasta sur la tegia da quels da Beuar a cio chia poassan condür laina et otras chiosas necessarias per edificatiun da quella alp, saia cun chiarra, chiavals a tuotta lur bsoeng, s'offerind a la paier per cuntschentscha dalg drett scha qualche dan iscuntres. Sü sura hauiad inclet plaunt et raspoasta, ditts e cuntarditts, inclet lg istrumaint dalla partizun, uais lg lhoe dalla diffarentia et clamo lg nom da Dieu in agüd, ais giüdichio scho sguonda :

1. Chia ditts da Samaedan poassan in que medem lhoe edificher ditta Alp et aquella druuer a lur bain plaschair ainfra lur tems hoatz et qui zieua. Item chia quels da Samaedan poassan per hoatz et qui zieua faer et mantegner üna uia largia et sufficiainta aint a trauiers per la Crasta sur la tegia da quels da Beuar, et chia poassan yr et turner tres lg plaun da quels da Beuar et passer per quella uia per hoatz et qui zieua, a tuot lur bsoeng, et da tuot temps, cun chiars, bers, chiauals, chiargias et tuot oter per lur bsoengs. Arsaluo chia nun poassan passer et turner cun vachias da düngiün temp per paschuler ne uschigloe. Item scha in fer ditta via gnis bütto gio crappa in la paschchüra da Beuar chia quels da Samaedan saian culpaunts da la mner dauent et la condür in la Gianda da doura, a cio chia nun uegna mis suot la paschüra. Item chia quels da Samaedan saian culpaunts somma la via sspta da faer üna saif da 5 cuors, numnedamaing ün cuors in meza la via et duos per vart. Item scha quels da Samaedan dessan dan in paschuler cunter lur cunsins u chia fessan yr vachias tres quella via chia ls wschins da Beuar ls poassan pendrer ün arainsch per uouta, suainter dit dalg istrumaint dalla partizum. Item chia ls da Samaedan dessen der als da Beuar per sspta via R 12 k — in daner bluotz in tuot. Süssura a requisitiun dallas parts ais schanto ün term tenur lg istrumaint dalla diuisiun da lotra uart da la Val, uiduart lova in üna tscherta Blais ün po sur loua in spuonda lg quel guarda a drett incunter lg prüm term schanto som la Crasta.

Duanto in lg loe sspt preschaint ls sspts et rogo tres me Zoartsch Trauers da Samaeden.

## X.

### Conuentiun intraunter Samaedan e Beuar causa lg Got d'Valbeuar.

In nom dalg Segnar amen. Ao 1551 adj 26 October ais fatt üna cufgnentscha intraunter las wschinaunchias da Samaedan e Beuar causa lg Got et Thais cumoen da dittas wschinaunchias in Valbeuar la quaela Val fütt cumpreda tres dittas wschinaunchias in cumoen scho sguonda: Numnedamaing chia ditt got et tuotta la laina chi sa chiatta luuaint des staer a requisitiun da las Alps in ditta Val et per lur üs e bsoeng da dittas Alps, arsaluo botz sco uain zieua. Primo chia in ditta Val nun dess gnir fatt üngün

botz u tschierchels per metter intuorn lg chiaschoel, suot paina da 5 lgifras mezaunas bluottas per inmünchia plaunta seurzeda per fer botz. Item chüngüna persuna nun des ne poassa pigler üngüna laina in ditta val da qualunque soart chi saia, ne quella our da ditta val mner, suot paina da inmünchia chiargia d'laina sechia pigleda suot peis da k. 30 scho eir per inmünchia plaunta sün peis et tagleda giu k. 40, las quaelas fallas dessan zainza remischien üngüna inmünchia uouta gnir scudidas et pigledas our ad aquels chi contrafaun, arsaluo scha qualchün arumpes in ditta Val qual crapent u üsaglia chel la poassa lo chüntscher, ma brichia metter sün lg chiar ne mner oura. Item chia in münnchia wschinaunchia des depüter duos muntaduors inmünchia an als quels uegna do lg saramaint a fin chia daegian buna chüra da ditta val, et chia stian tuotts quels chi surpassan scho uts., et chia dhegian authorited da fer palanter qualunque persuna saia cun daer lg saramaint u fer tuchier la bachetta, seguond chia a dels uain a plaschair, et aque a fing chia sapchian chi contrafo, et chia tuottas persunas saian intgnidas per lur saramaint da manifester scha saun qualchün chi haegia fallo. La quale cufgnentscha ais steda fatta tres ls Cuuis et Agents da ambas wschinaunchias et cun consentimaint da tuots lur wschins, scho dian, cieo Samaeden et Beuar, et ais steda fatta in Samaedan auaunt lg drett, siand Mastrael lg Honorat S. Jachiam q. Barnart da Selg, Jan Jachiam Cloet da Saluaplauna, Jan Maletta et Jachiam Muschchiaun da S. Murezi. Ls quels tres agiauüschi da ambas parts haun cun üna santenzchia cufarmo la sspta cufgnentscha.

Duanto in Samaedan in chaesa da Mathia Bunom lhoe sollit dalg drett, preschaint ls sspts Truuaduors. Et rogo tres S. Zoartsch Travers da Samaedan.

## XI.

### Partizun et Cunfins dellas Alps da Samaedan, scho eir particular Dretts.

In Nom dalg Segner amen.

Ao 1554 alg 15 July üna partiziun fatta a fier per hoatz et qui zieua sün desch Cumpagnias numnedamaing sün desch Alps, cumanzand in Chiesa S. Antonj Jenatz et giand zieua aestim et ais tuchio cun la soart a S. Antoni Jenatz cun seis Cumpangs Lalp Sur vuuel; a S. Jachiam Bifrun cun seis cumpangs lalp da Crasta;

a S. Jan Andreoscha cun seis cumpangs Lalp dадoura davart snestra, a Lucy delg Groas cun seis Cumpangs Lalp Ota, a S. Antony Planta cun seis Cumpangs Lalp Suffretta, a Dionisch cun seis Cumpangs Lalp palüdmarpa, a Steiuan Marting cun seis Cumpangs Lalp Sasnair, a Jachiam Salis cun seis Cumpangs Lalp da doura, da drett, a S. Battrumieu Biffrun cun seis cumpangs Lalp Myssau, a S. Zoartsch Travers cun seis cumpangs Lalp d'Valmuragl.

Sguondan ls Vordans das Alps.

Primo chia inmünchia ün gioda sia part d'Alp suainter sieu aestam in Lalp chi lg ais tuchio, saia chial venda u cumpra, chiamia u aerta, s'marida u nun s'marida, sco eir schel chiamia chiesas u proeuj.

Item, chia inmünchia Cumpagnia gioda sia Alp in tuots moeds a sieu bain plaschair, et chia fatschan uordens et artichels suainter chi ls pera bain, et chia inmünchia ün chiargia suainter sieu aestam et suainter ls uordans, et scha lg ais in lüna Alp vachias da vantag da lotra, schi daia gnir rato aint suainter lg uordan dacho chi apera.

Item chimünchia Cumpagnia in laurer intuorn Lalp s'Cuvègnian cun uordans a lur plaschair suainter lg plü dallas vachias d'aestim.

Item scha qualchün gnis mis in üna Cumpagnia chel nun ho part d'üsaglia Dalp schi daiel paier la ratta da quella part d'üsaglia per ün pretsch hunest; et aquella Cumpagnia inua chiel ais sto lg prüm et ho gieu part, lg peia eir ad el sia part dacho chiel ho hagieu per ün pretsch hunest, term a St. Martin 1555. Et schün qualchün hauues part da Düsaglias et nun chiargies chia quella cumpagnia per quella causa nun saia oblieda dalg paier fit da düsaglias.

Sguondan ls Cufins et Dretts da Las Alps.

Lalp palüdmarta ho seis Cufins in metz lg plaun grand a cio chi ls Cufins, Suffretta e palüdmarpa saian in metz lg plaun grand spt. tagland per metz ditt plaun da lüna et da lotra uart, insina sün lg fil dals munts a buna fe, arsaluo ls Dretts da las Alps da dains in lg temp da maelas oras, et oter Dretts. Item chia la fatscha sas punts per sieu üs zainza dan da la vschinaunchia. Item scha la uules rechiauer quel üttel da Taschins u uschigloie our da la paschiüra sur la sassa chia saia sieu, parò zainza pregüdicj della vschinaunchia, et da doters, et piglia gütta in münchenia an R 3 k.— ün et metz da Suffretta et ün et metz da Lalp Mysau.

Lalp Suffretta ho seis Cufins uers palüd martza scho sü zura. Item uers Crasta, in lg prüm vuel dadains la punt Suffretta, et chia la poassa in münchenia heffna ün dj yr sün lg Murthael d'murtiratsch, et chia lhaegia lg truog tres lg truog dadains lg sst vuel per ir e turner, zainza paschuler las aeras da Crasta ne la paschchüra loandar intuorn, ma solum per truger in sst murtiratz. Item in val Suffretta po pasculer cun Lalp da Crasta, generelmaing a lur plaschair, vain eir arsaluo ls Dretts da las otras Alps in lg temp da maela ora, et do gütta a palüd martza utsupra.

Lalp da Crasta ho lg rest aint dadains dit Vuel et in murtiratz scho eir in Val Suffretta utsupra. Arsaluo eir ls Dretts da las Alps da Beuar. Item chia la fatscha üna punt da dyr in la val Suffretta zainza dan da la vschinaunchia. Ditta alp piglia gütta ün münchenia an R 10 k.—, cieo da las duos Alps da doura R 5 k.—, da lalp Ota R 2 k.—, da lalp Mysaun R 1 k.—, da Lalp Zaruel R 2 k.— Item chia tuottas las Alps d'Valbevar haegian lur dretts in tuotts ls Gots da ditta val, scho ho la vschinaunchia da Samaedan per arder et fabricher arsaluo botz.

Alp Valmoralg cun seis Cufins infina giu tar ls Müoers a gnir in giu et nun plü inauaunt.

Item per yr oura in las Blais sur pro S. pedar. Item per giu Foppas da las As, et per las züchias dalg spich in sü et nun plü inauaunt a gnir ingiu. Allura eir sura et aint da Muottas inua chi ls plescha, arsaluo lg temp da naif a buna fe. Item chia las chefras nun poassan paschuler in dits Cufins, inua chia las vachias paun paschuler, arsaluo chia poassan passer lova d'Val muralg per yr alg spih sur ls pros pro s. pedar. Arsaluo chia per 2 Anns proassems poassan paschuler utsupra cieo ün dy leifna intaunt chia Taschins staun in valchiampagnia.

Item chia lotra muaglia da Samaedan nun poassa paschuler sur ls müoers ne d'prümauaira ne d'staed, arsaluo chia poassan yr auntz chia la muaglia giaia a dalp in las Blais d'pro s. pedar ui d'uart Lova d'valmuralg et cura chia so chiargio a dalp nun paune yr. Item chia quella Alp hegia laina per arder et fabrichier intuorn Lalp inua chia la uoul, et scha Lalp vain müdeda chia sur Lalp nun possa gnir do u piglio üngüna laina per defender Lalp da la Lauina,

Las Alps 2 da doura in Aruseg haun lur Cufins et paschulan genarelmaing da drett e da snester, dels terms contra quels da puntraschina infina ils terms infrascrits, numnedamaing da drett

infina alg Fasel lg quel ais lg prüm grand in Blais da Chüern, et infina som la Crasta, aque chi uerdscha inoura incunter las Alps da doura, et infina giu in fuonz per metz la Gianda chi ais da snester. Item da schneschter infina la Gianda et da la Gianda in giu infina lg Fuons dalg plaun, et in sü a dretta lingia infina lg fil a buna fe, arsaluo scha las Cumpagnias sauessan sacorder da partyr chia poassan. Item chia las alps da dains poassan saratrer in lg temp da la naif in las Alps da doura per lg plaun sün lg mender dan a buna fe, giand e turnand, suainter la naif, et suainter eir uain terrain. Item chia dittas 2 Alps da doura fatschan e mantegnan la punt spera Lalp veglia da doura dacho chia la ueoglian drueuer zainza dan da la vschinaunchia, et dettan a Lalp da Crasta R 5 inmünchia an utsupra.

Las 2 Alps Zaruel et Mysaun haun lur Cufins generels et pascheculan insemme, dals ssts Cufins da las Alps da doura inaint, generelmaing infina alla poaschia dalg got spes, in aque cuong dalg got spes, dadains Lalp Mysaun, et da Lotra uart infin aint dadains Lalp Zur Vuel infin lg Vuel chi ais dadoura Lalp veglia in lg plaun, et sur lg Got u sass chia lg Murthael sü zura sur lg sass infin per metz sur lg Vuel suot Sass Nair saia da las Alps Zuruel et Mysaun, ls quels Cufins dessan paschculer generelmaing, arsaluo scha sauessan sacurder da partir traunter per, schi poassan faer.

Item chia sur dittas tegias nun poassa gnir do ne piglio laina chi detta dan a las tegias. Item scha ueoglian fer qualche punt per lur üs chia fatschan zainza dan da la vschinaunchia et detten gütta in münchenia ann Lalp Zuruel a Lalp da Crasta R 2 et Lalp Mysaun a Lalp Crasta R 1 et a Lalp d'palüdmartscha R 1 k 30 uts.

Las 2 Alps Sasnair et Ota pascheculan lg arest generelmaing et insemme dals ssts Cufins inaint infin ls Cufins dalg Murtel, et chia las vachias nun passan aint ls Cufins, neir ls Boufs inoura. Item scha ueoglian faer punts u uias chia fatschan zainza dan da la vschinaunchia.

Arsaluo scha sauessan sacurder da partyr traunter per chia poassan faer, et Lalp Ota des daer a Lalp da Crasta R 2 lg an uts.

Item ls Boufs chi uaun per laina poassan gnir schgüts et paschculer intaunt chia s'chiargia in tuottas las Alps zainza inpidaint a buna fe.

Item chi nun poassa gnir fatt üngün botz in üngün loe ne got da tuotta la vsch이나unchia, taunt tassieu cho aruot, suot paina da desch Flurins, per inmünchia alp scha bain cha la fes nome ün botz sullet.

Item chia la vsch이나unchia fatscha sia part d'vias e punts, chi lg pertuochian da faer. Sumgiauntamaing eir la via in Aruseg, cun la punt Jan Lücy, et la punt da Crasta, et Lalp d'Valmuralg scha la voul punts per se chia land fatscha zainza dan da la vsch이나unchia.

Item chia pro Jan cun las — — — cun lur dretts da dyr et turner saian dalla vsch이나unchia, zainza cuntradictiun dallas Alps, a las quelas po pertucher.

Item chia tuottas las Alps, suainter lg temp et suainter chia sun dumeschchias u saluedgias, saian culpauntas da chiarger et schchiarger, cura chia Cuuis urdainan suot la paina tres els limitheda.

Item chia inmünchia Cumpagnia poassa müder tegia a sieu bain plaschair, ainfra seis Cusins. Arsalo las Cumpagnias chi haun paschchüra Cumoena nun poassan passer Loua.

Item circa (s. hr.) la grascha po inmünchia ün in Valbever la druuer a sieu bain plaschair, et schel nun la uoul druuer chiel la uoul vender aisal culpaunt prüm dala spoardscher a la Cumpagnia, a lur zieua als vschins, et lg dauous inua chi lg plescha, et per üna vacheda in palüdmartza per krüzars trais, in Suffretta krüzars 2, in Crasta k 1 et in las otras alps da la vsch이나unchia nun poassa üngün uender grascha our d'vart vsch이나unchia.

Item circa la grascha et otras chiosas s'daia inmünchia Alp aredscher suainter las plüs uuschs da las vachias d'aestam.

Item fatt e tratt las soarts da las Alps po las Cumpagnias scha sun per üna chiamier Alp, paro zainza pregüdicj da la vsch이나unchia et dals uordans sspts.

Item chia las güttas chia las Alps s'dessan der lhüna lotra saia culpaunt da faer der ls Chios dalp, et chia dessan gnir dedas da paier pastuors, inmünchia an, et dessan gnir dedas zieua lat da quels chi chiargian que an, per hoatz et qui zieua.

Dvanto et accepto per ratt e ferm per hoatz et qui zieua, et rogo tres me Zoartsch Trauers.

## XII.

### Santentzchia chi cunferma lantescritta diuisiun da las Alps da Samaedan.

In nom dalg Segnar amen. Ao 1555 adj 29 dalg mais d'Auuost ais confermo la sspta partizun da las Alps in Samaedan, cun ls

packs et ordinatiuns dacho chi aperan in ditta diuisiun, cun üna santenzchia da tuot lg drett da la Terra in Samaedan, tgnand bachetta S. Jachiam Biffrun Mastrel da que temp sur Funtauna Merla cun seis Truuaduors uts.

Duanto in preschentscha da las parts, et rogo tres S. Zoartsch Trauers.

### XIII.

#### **Arbitramaint causa la uia da Lalp Ota.**

In nom dalg Segnar amen.

Ao 1556 ady 24 Juny sün la differentia chi aduertyua intraunter la vschinaunchia et ls possessuors da Lalp Ota causa la uia fatta da noef ais jüdichio chia scha ls possessuors da ditta Alp haun fatt üna uia per lur üs, schi saian eir culpaunts da la mantegner zainza dan da la vschinaunchia arsaluo s'hauiad la vschinaunchia laschaeda incler per qualche hunuraunza schi ais la condanaeda per quaista Vouta sulamaing detta als possessuors R 20. k.— et chia scha qual particuler persuna ruunes ditta uia chia ls massers la poassan ratscharcher, e da quinder inuia chia la mantegnan zainza dan da la vschinaunchia. Ls quels daners utsupra sun schburzos. Duanto in Samaedan preschaint pardüttas et rogo tres S. Jachiam Biffrun.

### XIV.

#### **Cuvgnenscha u partizun dal God e Tais Cummoen in Vall-Bevar.**

Anno 1638 die 20 May in Samaedan  
in chaesa Ml S. Jan G. Planta Siand araspos insemmel las cuiv-aunzas da ditta vschinaunchia da S. e B., par causa dal God u Tais cumoen in Vall Bever insemmel cun oters depüttos da d. ammanduas vschinaunchias, sco sun . . . .

Proponind ils Sigrs da S., stant cha lur vschinaunchia s'achat-taiva e s'achatta al preschaint cun grand maungiel e zuond fick spoverieus in lur Tais da laina da foe, vscheja giavüschane vi alla vschinaunchia da B. chi voeglia conceder e staer tiers a partir il surscritt God Cummoen, accio ch'el poassa gnir nüzagio a melgder giudair da scodüna vschinaunchia et aque tuot poasa dvantaer sainza dann, prejüdici ne molestia ne da l'üna ne da l'otra vschi-naunchia, considerand Cuvichs et Agents da B. lur dumanda apussaiyla, ls haun gratisichos et do tiers cha poassa dvantaer,

cunbain cha la partizun e cumpra tenur las scritturas tschunchessen. Et sü sura ls ssts Sgrs Cuvichs et Agents a noma da tuottas duas vschinaunchias sun arastos bain unieus et adacoart da nüzagier e partir ditt God u Tais cummoen per saimper, a melgder giudair e nüzagier da scodüna vschinaunchia, saja da Linams, Foeglias, Giops u eir Arügds, in moed sco sguonda.

Primo chia vegnia cernieu quattar homens incligiantaivels et sabbis per vschinaunchia, chi gajen aint in la vall et prudaintamaing contempleschan il God u Tais, scha füss qualchossa da reserver per üss u bsoeng dallas Alps generaelmaing cha L poassan faer, in l'arest determiner e termir quaunt inaint ditta partizun s'dess astender, per nun spoverir las Alps in tuott dalg Linam per lur üss da d'arder.

Secundo lg moed chi saja da tegner in partir, et partieu ch'el ais prudaintamaing s'salvaer lg ün lg oter nun molestaer ne adannaer da tuott aque ch'a scodün vain a tuchaer. Et accurrid cha qualchün cun qual fall falless u praeteriss, cha la vschinaunchia u part adannaeda pudiant dal fall gnir in cognitiun lg poassan a tael u taels faer our üna falla tenur lur aschantamaint u artichel. Et la vschinaunchia da taels surpassaduors u dannaduors assister cha dettan satisfactiun alla part offaisa u adannaeda. Et nun pudiant otramaing gnir in cognoschentscha dal fall che s'poassa faer appalantaer cun il saramaint vigur e tenur scritturas, cuvgentschas e partizun da ditta Vall-Bever u Thais chi cler dispuonen, sco eir da Punt da Roeven inaint da drett, scha qual dann dvantess alla vschinaunchia da B., mo que solum per taunt co düra la condütta dailg Linam our d'Vall-Bever u Thais, et bricha plü inavaunt.

Tertio, la via et punts mantgnair da cumpagnia tenur scritturas et partizuns in ditta Vall bunas et suffitzchiaintas. Eir dess gnir fatt ün' otra punt da compagnia e mantgnida per mnaer e condür lg Linam da schnistar, et gnir schantaeda be da d'our Funtauna Fraida.

Vain eir declaro, vuliand alchüns mnaer u condür our laina dalg temp dalg iviern, cha taels sajen culpaunts da s'daer avis per arumper la via, in amenduas vschinaunchias, et s'staer tiers in la rumper paina R 1 per mnadüra u chaesa chi contrafess. Cun declaraunza pero cha la via vegna aruotta et mantgnida da quels chi la voeglian druaer, sainza dann dalas vschinaunchias u otras speciael persunas.

Quarto, vain eir fermamaing et severmaing inserieu et conclüt, cha la vschinaunchia da S. in tuotts temps da terrain et per la staet saja culpaunta, intgnida e obliaeda da d'ir e transir in ditta val per la via maistra e semda cumoena et bricha utro tenur scrittüras, et paina la falla in ilg aschantamaint da B. d'velmaing limiteda a chi preterescha, cione a peduns cr. 8 per persuna et cr. 16 crapent u mnadüras per scodüna vouta.

Quinto s'haun eir impromiss et bain inclets gliün glioter cha quaist achiüerdi, cuffgnentscha u partizun dailg Tais nun dess in üngiün gro ne puoinch purtaer praejüdici, nemain derogiae la cumpra et partizun veglia dala vall, mo ad aquella sincermaing et fermamaing restaaer daco che scrittüras declaeran et partizun do.

Sexto et ultimo, vain eir meilginavaunt declaro et serro giu, cha gnand al temp a gnir u aqui zieva a che temp chi s'voeglia las Alps in ditta Vall-Bever a bsoeng u maungel da linams saja per arafaer, cuvrir, faer da noef u in tuotts oter adroefs bsoeng u necessitaets chi poassen esser et iscuntrer da s'proveder e s'inservir da lur aegian Linams e our da lur Tais scodüna vschinaunchia sainza tuott danns e cuosts da l'otra, sco eir per faer, chüntschaer et mantegner punts in ditta Vall.

Actum . . .

